

## **EPESASA**

Poleme Epesasa wambu pepa pyao maiyamo renge mupwa suu pyao leyamo doko rombo 1 liti 10 pyasi palamo. Yuu gii pyaka separamo dokopa Anatumi banya wasisi peparae yake pandape isa pandape nyuo mendakyapala dokona Koraisa baa kyawa ingyuo kararaja lao suu piyamuli pira. Mende wambu peparae role pyao mendakinya kararami lao Anatumi rapa rapa piyamo renge doko Anatunya wambu Yesu Koraisa keta mendakinya karapala lasaka pirami lao Poleme laokondali piya.

Wambo piyamo dorena pyao dokopa renge angi doko lasaka pyuo lao, Rakane Anatumi nakama rombo palyuo nyiyamopa Yesunya ranjama dokome koo nyuo kame sakamiya. Dokopa Anatumi leyamuli pyuo kaeya nao banya wambu dupwa renge keyange nyerami dokona Imambu Poo Pyasi roo ingyuo wambo jiya, dopa lao piya. Enakana piyamo dorena pyao dokopa yaka larami wambu dupwa nakama Yesu Koraisa keta mendakyapala karaminyi doko nakamana pii lao nenge rambo lao piso karo dokopa lasaka pirami ingyiyamo lao piya.

Kongwalu lapo palyuo Anatunya wambu dupwa Yesu Koraisa keta mendakyapala karaminyi doko Poleme lasaka piya. Lasaka pyuo dokopa Elyambu Pingi doko yongo dopale. Yongo dokona Koraisa baa kyawa karamo. Dee mende opetae Elyambu Pingi doko anda dopale. Anda dokona Koraisa baa anda pinginya ingyuo

karamo. Deeko Elyambu Pingi baa enda dopale. Koraisa baa banya akali ingyuo karamo, Poleme lao piya.

Anatumi Yesu Koraisa keta banya mona keyange palyuo ipingi renge doko lasaka piyana lao pii piyamo dokona ipingi renge dokome siki nyepala renge kuiyuo sinya lao pii renge dokona rungi rungi pyao pyao reteya. Yesu Koraisa baa poo pyasi karo mona keyange palyuo ipyuo karo wambu mona reto nakamana lao kumapala koo dupwa kame sakamingi dusipa isa susa dopale ingyuo Poleme mana pii wakale lapo konda pyuo lamaiya.

### **Buku Dakena Pii Palamo Dusipa**

1. Pii kanda soo leya dupwa 1:1-2
2. Yesu Koraisamoo Elyambu Pingi wambu dupwape 1:3–3:21
3. Koraisa keta enenge ingyuo karalapape 4:1–6:20
4. Pii lao oto leya 6:21-24

### *Poleme Yako Lao Leya*

<sup>1</sup> Anatumi masiyamuli pyuo namba Pole Koraisa Yesunya aposele ingyuo karo. Anatumya yapasi wambu Koraisa Yesunya lao suu pyao minyuo Epesasa karaminyi dupwa keta pepa dake pyao peyakalyo.

<sup>2</sup> Namwana Rakane Anatu Kamongo Yesu Koraisapana mona keyange palyuo ipingi rengepe mona kyuu lao singi rengepe nakama keta sinya lao leto.

*Anatumi Koraisa Keta Namwa Elyape Jiya Doko*

<sup>3</sup> Kamongo Yesu Koraisana Rakange Anatu ketae pyambu karena. Baame namwa yake panda dorena imambunya yulu keyange wakasa palenge dupwa Koraisa keta namwa jiya.

<sup>4</sup> Anatumi yuu muu dupwa ene wasapa nao karo dokopa Koraisa role pyao kararama lao namwa rombo palyiya. Dokome namwa koo mende pali nao yapasi inginyi pyambwara ingilyamo. Anatumi renge kuiyuo mona reto karapala

<sup>5</sup> Yesu Koraisa keta namwa banya rangena ikinyingi ingyuo manjo nyeronjo lao mona nyepala suu pyao kaeyapya.

<sup>6</sup> Anatumi mona keyange palyapala banya Ikinyingi mona retenge doko namwa mee jiya dokona lao banya kingi lakandamana.

<sup>7-8</sup> Koraisana ranjama kulimbuo peyamo dokome namwa kiiramo nyisi karamano. Karamwanopa baa keta namwana koo dupwa kame sakapa pingi. Banya mona keyange palyuo ipingi doko andeyamosa namwa keta kakana pyuo jiya.

<sup>9</sup> Baa singi dokome sepala soo giso pyuo karenge dokome Koraisa keta mende piru lao masiyamuli pyuo renge yalu pisi doko nyuo namwa keta nolako piya.

<sup>10</sup> Yuu gii pyaka separamo dokopa Anatumi banya wasisi peparae yake pandape isa pandape nyuo mendakyapala dokona Koraisa baa kyawa ingyuo kararanga lao suu piyamuli pyuo pira.

<sup>11</sup> Anatumi mende piru lao masapala yulu peparae kaeya nao pingi. Dokome baa kanda soo dokopa suu piyamuli pyuo namwa Koraisapa

pako banya wambu ingyuo kararama lao rombo palyiya dokona ingyuo pelyamo.

<sup>12</sup> Koraisame namba keta mende pyakara doko wambo soo nyepeyama dupwame Anatunya yanga paupau lenge renge doko ketae pyambuo karapengele ingyuyamo.

<sup>13</sup> Dokona palyuo nakama opetae pii angi waili pii keyange doko soo manjipala Koraisa kapa ingingi lao suu piyami dokona pyuo nyisi karaminyi. Dokopa Anatumi nakama banyaŋa lao Imambu Poo Pyasi dokome mumbwa palyili lao jeronya leyamuli pyuo nakama keta maralyiya.

<sup>14</sup> Anatumi leyamuli pyuo kaeya nao banya wambu dupwa renge keyange nyerami dokona Imambu Poo Pyasi roo ingyuo wambo jiya. Dokona ingyuo namwa kiiramo nyisi kararama doko soo gisapala Anatunya yanga paupau lenge renge doko lakandamanale.

### *Polena Ateŋa Doko*

<sup>15</sup> Nakama Kamongo Yesu kapa ingingi lao suu pyapala Anatunya wambu yapasi yango mona reto karaminyi doko sepala

<sup>16</sup> nambame ateŋa lao dokopa kaeya nao ange lao karo.

<sup>17</sup> Namwana Kamongo Yesu Koraisana Rakane Anatu neta renge ingyuo karengge dokome Imambu Poo Pyasi jakana lao ateŋa lakalyo. Imambu Poo Pyasi nakama keta jeramo dokome nakama mona paliramopa Anatu dokona ingyuyuo soo nyerami.

<sup>18</sup> Nambame ateŋa lao dokopa imambunya lenge pendakae lapala Anatunya yanga paupau

lasi dupwa kandamili lao lakalyo. Baame banya wambu keta keyange pyakarono renge dupwa kandarami lao kee lao sukusa ipupwape leya.

<sup>19</sup> Banya porainya renge yapasi doko namwa Anatu kapa ingingi lao suu pyao karengere dupwa keta palena lao atena lakalyo. Porainya renge wakasa pyuo kareyamo dokomeyoko

<sup>20</sup> Koraisa kumasi siyamo dokopa minyalyuo lete nyepala yake panda dokona banya kingi ro-laerename pisiya.

<sup>21</sup> Dokopa mupwa dupwape ketae karamo dupwape poraingi dupwape kamongonge dupwape kingi ketae palenge dupwa pepararena Koraisa baa mupwa ingyuo petena lao piya. Yuu gii dusipana iki daako, yuu gii ene eparamo doko opetaenako.

<sup>22</sup> Baa karamo dokona lungwa lungwarename peparare karena lao, dee Elyambu Pinginya kyawa ingyuo karena leya.

<sup>23</sup> Elyambu Pingi doko Koraisa banya yongo dopale. Baa dokona renge kuiyuo piso nyimbu penge. Dopako pyuo peparare keta kapa kapa pyuo palenge.

## 2

### *Kumasi Kyuku Renge Kareyaminyipa Lete Wai Pyao Nyiya Doko*

<sup>1</sup> Nakama wamba yulu koo wakale wakale dupwa pyuo kareyaminyisa kumasi ingyuo kareyami.

<sup>2</sup> Nakama isa wambunya yulu koo pinginyili pyuo imambu koo dupwana kamongo doko

warombo soo kareyami. Kamongo doko wambu Anatu kando kamba lenge dupwana monarename yulu koo pyuo karamo doko.

<sup>3</sup> Namwa opetae dopako pyuo karo yanengena pyuwaneme kumuo karapala namwana suu pingipi yongo dokomepe koo dokona pyao ralinyi pyambuyamopa dolapona rape rape lao pyuo kareyama. Namwape doloma peparape mendakinya peyara Anatumi lara ingiya.

<sup>4-5</sup> Lara ingingi doko namwa yulu koo pipala dokopa kumasi ingyuo kareyamanopape Anatumi namwa ama sakapala mona reto kareyamo dokome namwa Koraisa keta lete wai pyao nyiya. Anatumi mona keyange palyuo ipyuo karengedokome lete wai pyao nyiyapya.

<sup>6</sup> Baame namwa Koraisapa role pyao minyalyuo nyepala yake panda dorena Koraisa Yesunya arapu dokona baapa pisiya.

<sup>7</sup> Dokopa yuu ene eparamo gii dupwana baa anjiki pipala banya mona keyange palyuo ipingi rengedokome wakasa doko Koraisa Yesu keta panara.

<sup>8</sup> Anatunya mona keyange palyuo ipingi rengedokome nakama baa kapa ingingi lao suu piyami dokome pyuo nyisi karaminyi. Nakama rangena yulunde daa. Anatumi emboneme pyuo nyiya.

<sup>9</sup> Wambunya yulu pimi dokome epelyande daako. Dopa pilyamo dokona mendeme range lakandapengele ingya nalyamo.

<sup>10</sup> Anatu range namwa wasiya. Namwa Koraisa Yesupa pako yulu keyange pirami lao wasiya. Namwa kata rolae dupwana papyuo kararama dupwa Anatumi wamba rapa rapa piya.

*Rara Paka Lakisi Kareyamanopa Koraisame Nyuo Komondeya Doko*

<sup>11</sup> Nakamana yanenge ketae dokome Juu daa rara wakale ingyuo kareyami. Yanenge awali lao kalomenge dupwame nakama yanenge awali lao kaloma nange lenge kandale. (Yulu doko kingimi iki yanenge dokona kalomenge.) Nakama wambo apiyakale ingyuo kareyami doko kame see nalapape.

<sup>12</sup> Wamba dokopa nakama Koraisapa liti pyuo karo, Isaraele rara dokopa wakale ingyuo kareyami. Anatumi Isaraele keta keyange mairunya lao pii lanyi sereyamo dokona nakama kamenge ambe ambe kareyami. Isa panda dokona Anatu soo nyii napala dokopa mende pyakarandelyamo lao mona kare kare kara nayami.

<sup>13</sup> Dopa pyuo nanesa kareyaminyipape epapu nakama Koraisa Yesu keta banya ranjama isa peyamo dokome nakama banya arapunya karaminyi.

<sup>14</sup> Baa namwana manda rao nyingi ingyuo karamo dokona banya rangena yongo dokome namwa Juu rara dee nakama rara wakale dupwape nyuo pakapala imbu singi kame lili piru kareyamo doko nyuo lalyinyi isa nembeya.

<sup>15</sup> Juu wambunya Lowa dupwape mawa pii dupwape waso karenge dupwape peparae mee ingyinyi nembeya. Nembapala rara paka lakisi siyamo doko kaepala baa keta nyuo komondapala rara enenge mendakinya ingyuo manda rao karena lao piya.

<sup>16</sup> Koraisame isa mamandona kumuyamo

dokome yanda pii lao rambu nyepala namwa nyuo mendakyapala Anatu kareyamo dokona dee lanyiya.

<sup>17</sup> Baame Anatupa Juu wambupi Juu daa rara wakalepe koto nyepala mona mendare palyingi waili pii keyange doko boo pyao lamaiya.

<sup>18</sup> Koraisa yulu andake piyamo dokona namwa rara laparae Imambu Poo Pyasi keta Rakange Anatu dokona repeta eparama.

<sup>19</sup> Dokona lao nakama epapu menge upunyili ingyuo kara napala Anatunya wambu yapasi dupwa pipya mendare ingyapyamopa Anatunya ree palu ingyuo karaminyi.

<sup>20</sup> Anda doko aposele akalipi poropeta akalipi dupwa andana renge kuingi isa dupwa ingyuo karaminyipa pisi karamo. Koraisa Yesu baame anda pinginya ingyaro karamo.

<sup>21</sup> Anda kimbu soo pisi dokona baame simuisa ingyuo minyaro karamo. Doko Kamongopa pako karo misi anda yapasi ingyuo andelyamo.

<sup>22</sup> Nakama opetae Koraisa keta kimbu silya sana pyuo pisi karaminyi. Anda pisi doko Anatu Imambu dokopa paleta karenge.

### 3

#### *Poleme Rara Wakale Dupwana Nyisiya Doko*

<sup>1</sup> Dokona lao namba Pole nakama Juu daa rara wakale dupwana lao Koraisa Yesunya anjisi akali ingyuo karo.



<sup>2</sup> Anatu mona keyange palyuo ipyapala nam-bame nakama nyisarenje lao yulu andake namba keta jiyamo doko siyami lao suu pilyu.

<sup>3</sup> Yalu pyuo palenge renge andake doko namba keta paneyamo siyu doko, (wambo pepana muu pyuo piyu kande.

<sup>4</sup> Pii pyasi doko yaka laparaminyi dokopa namba Koraisana yalu pingi renge doko kokorename kandeelyamo lao separami.)

<sup>5</sup> Doko wambu kyawa ingyuo kareyami dup-wame soo kara nayami doko epapuli aposele yapasi dupwape poropeta akali dupwape banya Imambumi lamaiyuo panapyamo simi.

<sup>6</sup> Yalu pisi renge epapu panyamo doko, Juu daa rara wakale dupwa waili pii keyange sepala Anatunya keyange dupwa Juu wambu pipya kapa kapa pyuo nyerami. Nakama namwapa yongo mendaki ingyapala Anatumi Koraisa Yesu keta keyange jeroŋo leyamo dupwa mokwa soo ny-erami.

<sup>7</sup> Anatu mona keyange palyuo ipyapala banya porai renge namba mee jiyamo dokopa namba waili pii minyingi akali ingiya.

<sup>8</sup> Anatunya wambu yapasi menge dupwa peparaena namba kamame isale ingyuo karapunupape Koraisana kamongonge bange kapa pyuo soo nyii naramili dupwa namba keta epeya. Doko Juu daa rara wakale dupwa mana lamaiyuo karapenge dokona lao jiya.

<sup>9</sup> Anatu baa bange peparae wasiya dokome ama kai wamba mende piru lao suu pyapala yambe piya doko namba lao panaronopa wambu peparae serami.

<sup>10</sup> Dokona ingyuo Anatunya soo gisinginya renge peparae Elyambu Pingi keta lasaka piramopa yake dorena poraipi mupwa dupwapeme soo nyerami.

<sup>11</sup> Anatumi wambo mende pironya lao suu pyao karengenyili pyuo namwana Kamongo Koraisa Yesu keta pipiya.

<sup>12</sup> Yesu kapa ingingi lao suu pyao baa keta pya-malyisi karo dokopa Anatu karamo dokona ena nembo mee kapa parama doko silyamano.

<sup>13</sup> Dokona ingyuo nambame nakamana lao randa nao karo dokona mona nemba nalapape. Nakama kapa palirami dokona lao randa koo nao karo.

*Koraisana Mona Retenge Dokona Makande Pyuo Letamo*

<sup>14</sup> Dokona ingyuo Rakange lao mona kando kingi lao karo.

<sup>15</sup> Baa keta piso yake panda isa pandape ree palu peparaena kingi lasi dupwa epeya.

<sup>16</sup> Kamongo Anatunya yanga paupau lenge renge jingi ingyuo lyuo karamo doko Imambu keta epo nakama maralyapala mona andarena porainyi pyambunya lao atenja lakalyo.

<sup>17</sup> Anatu kapa ingingi lao suu piyami dokona Koraisa nakamana monarena palyuo yuuli andale lena. Nakamame mona retenge renge dokona pingi pyapala porai ingyaramo kararami.

<sup>18</sup> Koraisana mona rentengena makande doko kamame andake dokome,  
Yuu nanesa pao oto runu panu lamo laope  
yuu ulu pao lepo pyuo lamo laope  
yuu ono komba ayanda pao lamo laope

nakama Anatunya wambu peparae dupwamoo  
pipya,  
kando simili yaka lao atena lakalyo.

<sup>19</sup> Kinyi Yesunya mona retenge renge wakasa isa  
wambumi soo ota paa nange doko soo nyeraminyi  
dokopa Anatu dokona mona retenge renge palyuo  
simbuo pelyamo doko makande minyuo nakama  
keta palyuo simbwara.

<sup>20</sup> Anatumi banya porai renge namwa  
keta silyamo dokome suu pyarama dupwape  
jinya larama dupwape kama konda pyuo  
yamarangunyi nembo jingi.

<sup>21</sup> Wambu wambowanape enakana  
dupwamepe Elyambu Pingi ketape Koraisa Yesu  
ketape Anatunya kingi doko ketae pyambuo puu  
parami.

## 4

### *Elyambu Pingi Doko Koraisana Yongo Mendaki Ingyuo Pelyamo*

<sup>1</sup> Namba Kamongona kingi reke lao puu maisi  
akali ingyuo karo dokome Anatu nakama kee  
leyamo dokona suu pyao keyange pyuo karala-  
pape lao poraiyuo leto.

<sup>2</sup> Nakama pau lao anjiki pyuo wambu yango  
kando waiya lao imbu singi nyii napala kenda  
jerami dupwa nyuo sakamyuo mona reto kar-  
alapa.

<sup>3</sup> Imambumi nakama mona mendare palyingi  
dokome nakama mendakinya ingyuo anjala an-  
jala paramopa yalya kando kararama lao po-  
raiyo suu pyao karalapape.

<sup>4</sup>Yongo mendaki dokako iki. Dee Imambu mendaki dokako. Anatumi nakama kyakale leyamo dokona keyange mende pyakara lao mona kare kare karaminyi doko renge mendakiko.

<sup>5</sup>Kamongo mendakiko, Anatu kapa ingingi lao suu pingi renge mendakiko, bapitisimo mendakiko.

<sup>6</sup>Namwa peparaena Rakange Anatu mendakiko, baa peparaena nyilyingi ingyuo karengenge. Peparaena kapa kapa pyuo pingi dee namwa peparaeta keta palengeko.

<sup>7</sup>Koraisa keta elyape dupwa epeyamopa Anatumi manda manjo nyeramanuli pyuo mokwa soo jiya.

<sup>8</sup>Dokona lao pii mende pyasi palamo. Baa pulyuo pao dokopa anamasi minyuo waiku nyiyamo dupwa lanyuo papala wambu keta mora petenge renge lapo mee maiya.

<sup>9</sup>Baa pulyuo peyana lao pii palamo doko apa letase? Baa lupyuo yuu donorename opetaeko peyana letamo.

<sup>10</sup>Baa lupyuo peyamo dokoko pao yake ketae ama dulurename peparaena pawiyalana peya.

<sup>11</sup>Baa mora petenge renge joo karengenge dokome, lapo aposele ingyini pyambuo, lapo poropeta ingyuo, lapo waili pii minyingi ingyuo, lapo rapu pingi ingyuo, dee lapo mana lenge ingyuo pyambuo piya.

<sup>12</sup>Dokome Anatunya yapasi wambu dupwa mondo lanyi pyambuo dokopa Kurisene yulu pirami dokome Koraisana yongo dokona andanyi nemberana lao piya.

13 Yulu dokomeoko pao namwa baa kapa ingingi lao suu pingi dupwa mendarele ingyuo parama. Dee Anatunya Ikinyingi dokona soo nyerami dokopa, Koraisa baa akali angingyuo karengere dokona manda manjo namwa andanyi nembarasa pira.

14 Dopa pyuo pirama ramo namwa wane kuki ingyuo wambu lapo yulu koona kendapuli ingyuo suu pingi kyai dokome namwa ukiaki minyilyasa panga soo nyilya nyana pyuo kararaminyipape namwa kao pele pele lao karengere dokona ingya naramasa pira.

15 Dopale ingya napala namwa wambu yango mona maipala pii rolae lao kararama dokome namwana akali kyawa Koraisa dopale ingyuo andamanale.

16 Baa kyawa dokona namwa banya kingi kimbu lengepe rangena panda dokona pyakuiyalya pyakuiyana piro kara napala kapa pela penge. Dokona namwa yongo mendaki ingilyamo dokome mende nyisalya nyisana pyuo poraiyuo piramano dokome yongo peparae mona retenge rengere dokona simuisa ingyuo ando para ingilyamo.

*Koraisa Keta Enenge Ingyuo  
Karalapape Letamo*

17 Kamongona kingi lao pii dake pyalana pyuo leto. Juu daa rara wakale see nao karengere dupwame kopetame suu pyao pyuo karaminyi dokona yulu dopale pii nalapape.

18 Nakamba suu pingi iminjyamo karo, kamente see nao pisipala mona kana pokwapala

Anatupa rekya lao karaminyi.

<sup>19</sup> Langa papyuo kanda lyanolyano pyuo yulu koo yeelyo pinya wangu lakapala pingi.

<sup>20</sup> Yulu dopale doko Koraisa keta siyamo kando nyii nayami kande.

<sup>21</sup> Nakama mana nyuo dokopa Yesu dokona kinyinya renge baa keta renge kuiyuo palenge doko siyami.

<sup>22</sup> Yulu wambarae pinginyili pyuo, pyuo papyuo karo kanda lyanolyano pinya wangu lakao piyaminysa nakama kokwa sinyi nembeya doko ramanyi nembalapape.

<sup>23</sup> Nakama mona suu pingipi alowa pyuo enenge ingyuo karalapape.

<sup>24</sup> Kyakana renge Anatu makande minyuo rolae pyuo yapasi palamo dokona nyuo maralyalapape.

<sup>25</sup> Dokona lao kyambo pii dupwa nembo Kurisene yango kando pii angi lao karamanale. Namwa yongo mendaki ingyuo pelyamo kande.

<sup>26</sup> Imbu singi epeya kande dokopa koo angi doko ketae nyii nao dee imbu singi paleta piso yuu kwuasinyi reta nao pipape.

<sup>27</sup> Satane baa panda mai nalapape.

<sup>28</sup> Waali dupwa deeko waa nyii nana. Waa nyii nao rangena kingi dolapome yulu andake pyuo rolae pyuo karena. Yulu andake pipala kakana seramo dokona nyuo wambu bange aeyange dupwa maiyuo karara.

<sup>29</sup> Pii koo dupwa nakamana kambunya neta nyii nao pii keyange yapo, pii keyange dupwa lao wambu yango nyisaraminyi dokopa serami dupwa elya pisi ingyuo parami.

<sup>30</sup> Anatunya Imambu Poo Pyasi lekeleke koo rena lao pii nalapape. Anatumi yuu gii lumwa piramo dokopa nakama kiiramo nyeronya lao kongwalu palyuo Imambu Poo Pyasi maralyinyi pyambuya.

<sup>31</sup> Nakama ingi koo palyuo, imbu singi manjo, imbumi kumuo, pii porakai lao, mendali koo koo lengepe yulu dupwa rekya lao nembalapape.

<sup>32</sup> Mendeme mende kando anjiki pyuo karo mona pau lao, Anatumi Koraisa keta nakamana koo dupwa kame sakaya dokona suu pyao nakamame yango mendena koo dupwana suu pyanyi pyano kara nalapape.

## 5

### *Yanga Paupau Lenge Dorena Karalapa Letamo*

<sup>1</sup> Nakama Anatunya mona nyingi wane wanakepe ingyuo karaminyi dokona banya yulu pinginyili pyuo pyuo karalapape.

<sup>2</sup> Koraisa namwa mona reteyamo doko suu pyao yango mona reto karalapape. Baame mona retapala namwana lao kumuo maiyamopa rendamu kyaa keyange nyingi dopale Anatu nyiia.

<sup>3</sup> Nakama kanda lyanolyano pyuo enda bangepe nyipuli nyipuli lao pii dopale Anatunya wambu yapasimi lao kararami ingilyande daa.

<sup>4</sup> Mora pii koralepe kopyali piipi mee ketae giyalya giyana pyuope kapa laa napenge ingingi dupwana laa kaepala Anatu dokona sangyu lao karapengele ingilyamo.

<sup>5</sup> Pii dake kinyi lao suu pyalapape. Wambu kando lyanolyano pingipi suu pingi karo petengepe yanengena bange nyerami dokona iki wangu lakapala suu pyao karengepe (doko Anatu kaepala bange wakale dupwa Anatu ingyuo panda maimisa pilyamo) dupwame nakama Koraisa Anatupana iso karenge panda dokona moyange nyii narami ingyiamo.

<sup>6</sup> Lapome epapala mee kambumi pii nupi soo larami dupwana waso karalapape. Koo dopale pyuo karo kamba letaminyi dupwa keta Anatumi kote lara ingyiamo.

<sup>7</sup> Dokona ingyuo nakamame nakamba role pyao kara nalapape.

<sup>8</sup> Nakama wamba iminjiyamo dokona isa sulu sulu paeyo kareyaminyipape epapu Kurisene ingyapala Kamongona yanga paupau lenge dokona karaminyi. Dokona yanga paupau lengena wane wanakepe ingyuo karalapape.

<sup>9</sup> Yanga paupau lenge dokome yulu keyangepe yulu rolaepe yulu angipi nyuo andanyi pyambwarasa pira.

<sup>10</sup> Kamongome epe kandarali dupwa mana nyepala pyuo karalapape.

<sup>11</sup> Iminjinginya yulu kalu kalu paeyo silyamo dupwana rekya lao karapala koo pilyaminyi dupwa nyuo pano serakamipape.

<sup>12</sup> (Nakamba yulu koo yalu pyuo pilyaminyi dupwa polo lakalana dokopa elya nyerama ingyiamo.)

<sup>13</sup> Bange peparae yanga paupau lenge panda seramo dokopa dopalendelamo lao angi panara.



<sup>14</sup> Panasi dupwa yanga paupau lasi dokona ingyuo para. Dokona lao pii dopa lao pyasi palamo.

Kumasi ingyuo luu palaminyi dupwa

lengé rao sipuralapape dokopa

Koraisame nakama keta neta ranyi pisinyale.

<sup>15</sup> Dokona nakama apa pyuo kararama lao kandokondali pyuo karalapape. Kopyali ingya napala wambu angi ingyuo paeyo karalapape.

<sup>16</sup> Epapu yuu gii koo epelyamo dokona mee kara napala yulu keyange pepenge dupwa pyuoko karalapape.

<sup>17</sup> Kopyali ingyuo kara nalapape. Kamongome nakama pimili lao suu pilyamo dupwana sepala pyuo karalapape.

<sup>18</sup> Waene ipwange langa andare nao kyawa sisingi bolombalo lanyi nembasasara naa nalapape. Naa napala Imambu Poo Pyasi nyepala palyuo simbwaramopa karalapape.

<sup>19</sup> Nakama yango sukusa misi kenane dupwape Imambunya kenane dupwape pyao, Kamongo keta kenane dokome monarename piso nyuo ipwa kyukunaiye maiyuo pena lao pyao karalapape.

<sup>20</sup> Namwana Kamongo Yesu Koraisana kingi lao Rakane Anatu dokona kaeya nao bange yulupi peparaena suu pyao sangyu lao karalapape.

### *Enda Akalipana Pii Palamo*

<sup>21</sup> Koraisa wakasa dokona mona nembo wambu yango dolomana lungwa lungwarename ingyuo karalapape.

<sup>22</sup> Nakamba enda dupwa Kamongo baa mupwa lao suu pyapala banya pii dupwa warombo soo petenge dokonako palyuo akalingi kando pipwape.

<sup>23</sup> Koraisa baa Elyambu Pinginya mupwa ingyuo karamo doko suu pyao akali dupwa nakamana etenge dokona mupwa ingyuo karengi. Koraisa baa banya yango Elyambu Pingi doko Lete Wai Pyao Nyingi ingyaro karamo.

<sup>24</sup> Elyambu Pingi doko Koraisana pii rape rape lao soo petenge doko suu pyao enda dupwa nakamana akalinginya yulu peparaena rape rape lao soo pyuo pisipape.

<sup>25</sup> Yesu Koraisame Elyambu Pingi doko mona reto karapala reke lao kumuo paleya. Dokona ingyuo akali nakamana enda mona reto karalapape.

<sup>26</sup> Koraisame Elyambu Pingi doko, banya pii keyangepe ipwapeme wate pyuo mondo lapala banya iki lao yapo nyiya.

<sup>27</sup> Dopa pyuo Elyambu Pingi doko banya lenge kambu dorena rao kui kui lanyi pyambu, nyisi yaku nayape pisi nao, pepo kareta kiminju palyuo bwualyambwuana pyuo paa naramopa range nyero lao piya.

<sup>28</sup> Nakama akali dupwa rangena yongo mona reto karaminyi dokonako ingyuo nakamana enda mona reto karalapape. Dokona lao mendeme enda mona reto karara ramo doko baa range mona retarasa pira.

<sup>29-30</sup> (Akali mendeme rangena yanenge awa naa nange. Rangena yanenge mondo lao elya pyuo karengi kandale. Namwa Koraisana yongo men-

daki dokonakonde karamano dokona Koraisame Elyambu Pingi mondo lanyi pyambungi.)

<sup>31</sup> Dokona lao Anatunya pii pyasi doko, Akali dupwame nakamana endangi rakangepe yaki nyeraminyipa enda dokopa pakao pisirambinyipa nakamba mendaki ingyuo para letamo.

<sup>32</sup> Pii andake yambe pyasi palamo doko Koraisapa dee Elyambu Pingi dokopana letamo lao suu pilyu.

<sup>33</sup> Pii doko namwa wambu peparata keta lao palamo. Doko nakama akali peparae range mona reto karaminyi dokonako ingyuo nakamana enda mona reto karalapape. Dee enda dupwa nakama akalingi ketae pyambuo pisipape.

## 6

### *Wane Wanakepana Pii Palamo*

<sup>1</sup> Nakama wane wanake dupwape Kamongo dokona lao endangi rakangepa laraminyili pyuo warombo soo pipape. Dopa pyuo pingi doko yulu rolae.

<sup>2</sup> Anatunya mawa pii lasi dupwana mende doko, Endangi rakangepa dolapo angingyuo karambinyi lao suu pyaro karalapape leya. Pii doko andake ingyuo mende pyakaramo dokona lao kaeyo leyasa piya.

<sup>3</sup> Dokona moko minyuo pirami ramo kapa palyuo isa yuunya gii andarele karare ingilyamo lao makande pyuo pyasi palamo.

<sup>4</sup> Endangi rakangepe dupwa nakamana wane wanakepe imbu singi nyakami nalapape. Mondo koo lao mana lamaiyuo Kamongona kingi lao ando pena larami.

*Kendemande Banyanya Isingi Akalipana  
Pii Palamo*

<sup>5</sup> Kendemande akali dupwa nakamana yulu pyakamaingi akali dokona mona mendare palyuo inyimungu mona nembo Koraisana kingi dokona lao pyuo karalapape.

<sup>6</sup> Nakamame nakama kando kararami mange dokopa iki rae maimili lao pii nao, yulu pyuo dokopa Koraisana kendemande ingyuo Anatu pimili lao suu pilyamo doko monana manjo pipwape.

<sup>7</sup> Mee akalinya yanenge dokona pilyu lao suu pyao piraminde daa. Kamongo dokona lao yulu andanyi nembo pipape.

<sup>8</sup> Kendemande akali mee akalimipi yulu keyange pirami dokona Kamongo baame isingi manda manjo yano pyao kingi kiso jera lao suu pyao pipape.

<sup>9</sup> Nakama numi dupwame, nakamana kendemande dupwa kando mona mendaki dokona palyuo pipape. Pii porakai pyalana pyuo laa nalapape. Nakama nakambanape Kamongo yake panda karengé dokome koo epengepe dokona suu pyaa nao karengé doko suu pyalapape.

*Yanda Pinya Anatunya Bange Wakyaro Karengé  
Doko*

<sup>10</sup> Pii dake lao lumwa pyuo leto. Kamongopa pako karo banya porainya rengé doko nyepala kulisa palyuo karalapape.

<sup>11</sup> Anatunya yanda pingi bange dupwa nyuo maralyaro karalapape. Dokome imambu koo doko panga seramo dokopa porai ingyapala mee kararami.

<sup>12</sup> Namwa wambu yango sukusa dokona yanda pilyamande daa. Imambu koo malu yakena palenge dupwape mupwa dupwape iminjingi pandana numi dupwape pipya yanda pilyamano.

<sup>13</sup> Dokona lao Anatunya yanda pingi peparae nyuo maralyapala yuu gii kwaeyaramo dokopa porayapala pyao pyalowa pyuo karo pao nenge rekya lapala kararami.

<sup>14</sup> Dokona ingyuo rapa rapa pipape. Marapu wapungi dokona kinyi kinyinya renge doko wapuo karo, romba kyangalipi dorena yulu rolae doko puu saneme komau wapusi porai pee pyuo karo.

<sup>15</sup> Manda rao nyingi waili pii keyange doko kimbu dokona pee piro karalapape.

<sup>16</sup> Anatu kapa ingingi lao suu pingi konambe doko nyepala ketaele alya minyuo koo pinginya walaka isare paleta dupwa kunjinyi nembo karare.

<sup>17</sup> Kyawa rarange kapame wasisi pyuo lete nyingi doko andu pipala, Imambunya wua gela Anatunya pii doko wakyaro karalapape.

<sup>18</sup> Imambumi renge kuiyuo yuu peparae kaeya nao atenja lalapape. Anatu dokona atenja peparae sokondali pyuo karalapape. Dokona lao lenge rao karo, Anatunya wambu yapasi peparae dokona kaeya nao atenja lakamailapape.

<sup>19</sup> Nakamame namba opetaeko atenja lakaraminyipa dokome namba waili pii keyange koko palenge dupwa pyongo pyaramopa kambu yaepapala ena nembo lao kararo.

<sup>20</sup> Dokonako ingyuo namba waili pii lenge akali dokona puu maiminyi karo. Nakama atenja

lakarami dokopa namba enja nembo mona kumapala lao karapili lao lalapape.

*Poleme Lao Oto Dokona Yako Lao Leya*

<sup>21</sup> Namba apa pyuo karo akinde pyuo karene lao Tikikasa namwana yangonge mona retenge Kamongona yulu rolae pingi akali dokomeoko peparae rolo langira.

<sup>22</sup> Dokonako lao baa nakama karaminyi dokona pena leto. Namwa apa pyuo karaminyi dokona langyuo mona minyarambwako karara.

<sup>23</sup> Yangonemoo Rakane Anatu Kamongo Yesu Koraisapana mona kyuuo lao singi reengepe dee mona reto karo Anatu kapa ingingi lao suu pingi reengepe nakama keta palena leto.

<sup>24</sup> Namwana Kamongo Yesu Koraisa dokona yaki nyii nao mona reto karaminyi wambu keta Anatunya mona palyuo ipingi renge doko pale-nale lao leto.

**BUKU BAEMOLE**  
**The Shorter Bible (New Testament and selected**  
**portions of the Old Testament) in the Kyaka Enga**  
**language of Papua New Guinea**  
**Buk Baibel long tokples Kyaka Enga**

Copyright © 1973, 1980, 1987 The Bible Society of Papua New Guinea

© Faith Comes by Hearing

Language: Kyaka Enja (Kyaka Enga)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 18 Apr 2025 from source files dated 31 Aug 2023

8949d805-1f35-50b7-ae5d-683fec0bae65